

Umiarsuarni inuttat pillugit inatsisip Kalaallit Nunaanni atuutilersinneqarnissaanik peqqussut

UAGUT MAGRETHER AAPPAAAT, Guutip saammaanneragut Danmarkip Dronningia, nalunaarpugut:

Umiartortut pillugit inatsisip allannguuteqartinneqarnera pillugu inatsimmi nr. 1462, 22. december 2004-meersumi § 4 aamma umiarsuarni inuttat pillugit inatsit, imarsiornerup isumannaatsuunissaa pillugu inatsisip allannguuteqartinneqarnera pillugu allannguinermik inatsimmi nr. 493, 12. juni 2010-meersumi § 9, imm. 3, umiartortut pillugit inatsit inatsisillu allat assigiinngitsut aamma umiarsuarni inuttat ikisinneqartarnerat pillugu inatsisip atorunnaarsinneqarnera pillugu inatsit, umiarsuarni inuttat pillugit inatsisip allangortinneqarnera pillugu inatsimmi nr. 622, 14. juni 2011-meersumi § 7, imarsiortut akileraaruserneqartarnerat pillugu inatsit, umiartortut pillugit inatsit, Handelsflådens Velfærdsråd pillugu inatsit aamma imarsiornerup isumannaatsuunissaa pillugu inatsit, umiarsuarni inuttat pillugit inatsisip allangortinneqarnera pillugu inatsimmi nr. 478, 30. maj 2012-meersumi § 6, imarsiornermik ilinniartitaanerit pillugit inatsit aamma ilisimasortat pillugit inatsit, digitaliusumik pinngitsoorani attaveqatigiittarnissaq il.il. pillugit inatsisitigut aalajangersakkat assigiinngitsut allannguutaat pillugit inatsimmi nr. 1231, 18. december 2012-meersumi § 70, imm. 4, aamma imarsiorneq pillugu inatsisip allangortinneqarnera pillugu inatsimmi nr. 1384, 23. december 2013-meersumi § 10, imm. 2, tissarlukut pillugit inatsimmut 10. april 1895-meersumut tapiliussaq pillugu inatsit, umiarsuarni inuttat pillugit inatsit inatsisillu allat assigiinngitsut kiisalu sunngiffimmi angallatit nalunaarsorneqartarnerannut akitsuut pillugu inatsisip atorunnaarsinneqarnera pillugu inatsit, aamma imarsiornermi inatsisip allangortinneqarnera pillugu inatsimmi nr. 400, 2. maj 2016-meersumi § 5, umiarsuarni inuttat atorfinitsinneqartarnerinut atugassaatat pillugit il.il. inatsit, naapertorlugit aalajangersarneqarpoq:

§ 1

Umiarsuarni inuttat pillugit inatsimmi nr. 15, 13. januar 1997-meersumi, peqqussutikkut nr. 608, 25. juni 2011-meersukkut Kalaallit Nunananut atuutilersinneqartumi, inatsisikkut nr. 1173, 19. december 2003-meersukkut allannguuteqartinneqartumi, peqqussutikkut nr. 212, 23. marts 2005-meersukkut Kalaallit Nunaannut atuutilersinneqartumi makku allannguutigittinneqarput:

1. § 4, imm. 2, imatut oqaasertalerneqarpoq:

Imm. 2. Umiarsuit 20-t inorlugit tamakkiisumik usitussusillit nunagisap iluani angallaveqartut ilaasa inuttassaat aalajangersumik amerlassusilerneqarsinnaapput, imm. 1-milu eqqartorneqartumut allagartamut taarsiullugu amerlassusiliineq Søfartsstyrelsimi Nalunaarutini nalunaarutikkut nalunaarutigineqarsinnaalluni.”

2. § 8 imatut oqaasertalerneqarpoq.

“§ 8. Igasoq, umiarsuarni inuttat amerlassusilerneqarneranni ilanngunneqartoq, umiarsuarni igasutut danskisut allagartaqassaaq. 18-t inorlugit ukiullit umiarsuarni igasutut sulisinnaangillat.

Imm. 2. Umiarsuarni inuttanut inuussutissanik piareersaasunut imaluunniit piareersaanermi ikiuuttunut ilinniagaqarsimanissamik piunasaqaatit pillugit maleruagassanik Søfartsstyrelsi aalajangersaasinnaavoq.”

3. § 10-p kingorna kapitali 4-tut ikkunneqarpoq:

“§ 10 a. Sunngiffimmi angallatit pitsaassusissaannik piunasaqaatissanik Søfartsstyrelsi malittarisas-siorsinnaavoq.”

4. § 13 imatut oqaasertalerneqarpoq:

“§ 13. § 6, imm. 1, § 7, imm.1, § 8, imm. 1, § 9 aamma § 10-mi allassimasut Danmarkimi ilinniartitaanerit imarsiornissamullu uppersaatait pillugit piumasaqaatit inuussutissarsiutinut piginnaalersitsisut ilinniartitaanerit pillugit soraarummeernermut uppersaatait illugiilluni akuerinissaat pillugu Danmarkimi maleruagassat atuuttut naapertorlugit danskit umiarsuini sulisinnaasunut inunnut atorneqassanngillat. Umiarsuarni niuffagiutini aalisariutinilu umiarsuit aquttui danskisut innuttaassuseqartuussapput.

Imm. 2. Imm. 1-mi oqaaseqatigiit aappaanni danskisut innuttaassuseqarnissaq pillugu piumasaqaat inunnut Danmarkimi maleruagassat atuuttut malillugit umiarsuarni niuffagiutini aalisariutinilu ingerlatsisinnaatitaasunut atuutinngillat.”

5. § 18, imm. 1, nr. 3 aamma 4, atorunnaarput taarsiullugulu ikkunneqarpoq:

“3) umiarsuarni ilaasartaatini inuttat aamma

4) umiarsuarni uuliamik, akuutissanik gassinillu usisaatini aqumiut inuttallu, aamma

5) igasut, igaffimmi sulisut sulisullu allat angallammi inuussutissanik passussisut piareersaasullu.”

6. § 19, imm. 2, oqaaseqatigiit aappaat imatut oqaasertalerneqarpoq:

“Taamaattoarli danskisut innuttaassuseqarnissamik inatsimmi piumasaqaatip malinneqannginnissaa Søfartsstyrelsi akuersissutigisinnaavaa.”

7. § 20, imm. 1 atorunnaarpoq.

Imm. 2-6 matuma kingorna imm. 1-5-nngorput.

8. § 20, imm. 4-mi, imm. 3-nngortumi, “Søfartsstyrelsi” kingorna ikkunneqarpoq: “imarsiornermik inuussutissarsiuteqarnermut allagartanik piginnaasaqarnikkullu uppersaatinik atuutilersitsineq, tassunga ilanngullugit akiitsuutit,”

9. § 24-mi “taamaattoq tak. § 20, imm. 4.” imatut allanngortinneqarpoq “taamaattoq tak. § 20, imm. 3.”

10. § 24-p kingorna kapitali 8 sioqqullugu ikkunneqarpoq:

“Kapitali 7 a

Ilinniartitaanerit akuersissutigineqartarnerat

§ 24 a. Namminersorlutik Oqartussat Søfartsstyrelsimik isumaqatiginninniareerlutik § 18 aamma § 19 naapertorlugu maleruagassani aalajangersarneqartunik ilinniartitaanerit pillugit maleruagassanik aalajangersaasinnaapput, tassani ilanngullugu pitsaassusissamik qulakkeerinnineq.

Imm. 2. Ilinniartitaanerit nunani tamalaani piumasaqaatinik aalajangersarneqartunik naammassinninersut ilinniagaqartullu piginnaasanik naammattunik angusaqarnersut Søfartsstyrelsimit nakkutigineqassapput.

Kapitali 7 b

(Ilanngunneqanngilaq)

Kapitali 7 c

Ilinniartitaanerit pikkorissartarnerillu pillugit aalajangersakkat assigiinnigitsut

§ 24 f. Pikkorissartitsisunik ilinniarfeqarfinnillu akuersinermut pitsaassusiinillu qulakkeerinermit akiliutinik Søfartsstyrelsi akileeqqusisinaavoq.

Imm. 2. Inatsimmi matumani pineqartunik pikkorissarnernut peqataanermut akiliutit pillugit Søfartsstyrelsi maleruagassiorsinnaavoq, tassani ilanngullugit soraarummeernerit, misilitsinnerit il.il.

§ 24 g. Atuartitsineq, pikkorissarnermi peqataasussat, sulisut, aningaasaqarneq aamma atortussat il.il. pillugit pikkorissartitsinissamik neqerooruteqartunit ilinniarfiinniillu, inatsit malillugu Søfartsstyrelsip suliassaasa ingerlanneqarnissaannut atugassat pillugit paasissutissanik pisariaqartinneqartunik Søfartsstyrelsi pissarsiniarsinnaavoq, tassani ilanngullugit pitsaassusissap qulakkeerneqarnissaa aamma kisitsisitalersuinnermut tunngasut.”

11. § 25, *imm. 2* atorunnaarpoq taarsiullugulu ikkunneqarpoq:

“*Imm. 2.* *Imm. 1* atuuppoq, suleqatigiiffiit allat, suliffeqarfiit imaluunniit inuit, umiarsuaatilik imaluunniit umiarsuup naalagaa sinnerlugu suliassat ilaannik pisussaaffinnilluunniit naammassinninersut apeqqutaatinnagu.

Imm. 3. FN-imi Internationale Maritime Organisationip aalajangersagaanik umiarsuarmik isumannaatsumik ingerlatsinissaq pillugu najoqqutassaq naapertorlugu naapertuuttoqarneranik suliniaqatigiiffimmut allamat, suliffeqarfimmut imaluunniit inummut uppersaasiortoqarsimappat suliniaqatigiiffimmut, suliffeqarfimmut inummulluunniit pineqartumut *imm. 1* aamma atuutissaaq.

Imm. 4. *Imm. 1-3* malillugu pisussaaffiit pillugit maleruagassanik erseqqinnerusunik Inuussutissarsiornermut ministeri aalajangersaasinnaavoq tassungalu ilanngullugu attaveqatigiinnermut oqaatsinullu piumasagaatinik immikkut ittunik aalajangersaasinnaalluni.”

12. Kapitali 9-mi qulequtaq imatut oqaasertalerneqarpoq:

“*Nakkutilliineq, attaveqatigiinneq piginnaatitsissutinillu inissiineq*”

13. § 25-p kingorna kapitali 9-mi ilanngunneqassaaq:

“§ 25 a. Imarsiornerup isumannaatsuunissaa pillugu inatsimmi § 20 a naapertorlugu inatsisip matuma eqqortinneqarneranik taannalu naapertorlugu maleruagassanik atuutilersinneqartunik Søfartsstyrelsi nakkutilliissaaq.

§ 25 b. Inatsimmi matumani imaluunniit inatsit taanna naapertorlugu maleruagassani atuutilersinneqartuni pissutsit pillugit oqartussanut allakkatigut attaveqatigiinnerup digitalikkut ingerlanneqarnissaa pillugu maleruagassanik Inuussutissarsiornermut ministeri aalajangersaasinnaavoq.

Imm. 2. Digitalikkut attaveqatigiinneq pillugu maleruagassanik erseqqinnerusunik Inuussutissarsiornermut ministeri aalajangersaasinnaavoq, tassunga ilanngullugit qarasaasiat aalajangersimasut, digitalikkut najoqqutassat immikkut ittut aamma digitalikkut atsiorneq assigisaasaluunniit atorneqarneri pillugit.

Imm. 3. Digitalikkut nalunaarut anngussimasutut isigineqassaaq nalunaarummik tigrisussamit pissarsiarineqarsinnaalerpat.

§ 25 c. Inatsit manna imaluunniit inatsit taanna naapertorlugu maleruagassiat malillugit aalajangiinerit allagaatillu allat atsiornagit, maskiinakkut taamaaqataanilluunniit atsiorneq saqqummersinneqartillugu imaluunniit periuseq atorneqarluni aalajangiisup imaluunniit allakkiortup kinaanera paatsuugassaangitsumik qulakkeerneqarluni oqartussanit atuutilersinneqarsinnaaneri pillugit maleruagassanik Inuussutissarsiornermut ministeri aalajangersaasinnaavoq. Aalajangiinerit allagaatillu taamatut ittut aalajangiinnermut allagaatinullu inummit atsiorneqarsimasunut sanilliunneqarsinnaapput.

Imm. 2. Aalajangiinerit allagaatillu allat, elektronikkikkut suliarineqarnerat tunngavigalugu aalajangiiffigineqartut imaluunniit atuutilersinneqartut, oqartussat pineqartut nassiussisutut allanneqarnerisigut taamaallaat atuutilersinneqarsinnaaneri pillugit maleruagassanik Inuussutissarsiornermut ministeri aalajangersaasinnaavoq.”

14. § 26-mi *imm. 1* sioqqullugu immikkoortoq nutaaq ikkunneqarpoq:

“Ministerimik pineqartumik isumaqatigiissuteqarnikkut inatsit malillugu Søfartsstyrelsip pisinnaatitaaffii pisortatut oqartussanit allanit ingerlanneqarsinnaaneri pillugit Inuussutissarsiornermut ministeri aalajangersinnaavoq. Piumasaqaatit erseqqinnerusut tunngavigalugit ilinniartitaanerit pikkorissarnerillu pitsaassusaasa qulakkeerneqarnissaannik Søfartsstyrelsi sinnerlugu nakkutilliinissamut suliffeqarfiit imaluunniit inuit ataasiakkaat Inuussutissarsiornermut ministerimit pisinnaatinneqarsinnaapput.”

15. § 27-mi imm. 1-p kingorna immikkoortoq nutaaq ikkunneqarpoq:

“Imm. 2. Umiarsuaatileqatigiiffiup § 25, imm. 1, nr. 1 imaluunniit 2 malillugu pisinnaatitaaffini suliniaqatigiiffinnut allanut, suliffeqarfinnut imaluunniit inunnut, tamakkiisumik ilaannakuusumilluunniit isumagisas-saangortissimappagit, imm. 1 taamaaqataanik, pisussaaffiit naammassineqarsimangippata, suliniaqatigiiffinnut, suliffeqarfinnut inunnulluunniit taakkununga atorneqassaaq.”

Imm. 2 matuma kingorna imm. 3-nngorpoq.

16. § 28-mi imm. 2-p kingorna immikkoortoq nutaaq ikkunneqarpoq:

“Imm. 3. Umiarsuaatileqatigiiffik imaluunniit umiarsuup naalagaa sinnerlugu suliassat imaluunniit pisussaaffiit ilaanik suliniaqatigiiffiit allat inuilluunniit naammassinngippata imm. 1 aamma 2 taamaaqataanik atorneqassapput, § 25, imm. 2 aamma 3 naapertorlugu.”

17. § 29, imm. 1 imatut oqaasertalerneqarpoq:

“Ingerlatseqatigiiffiit il.il. (inatsisitigut pisinnaatitaasut pisussaataasullu) unioqutitsisimappata inatsisitigut pisinnaatitaasoq pisussaataasorlu taamaanermisut akiliinissamut akisussaatinneqarsinnaavoq. Naalagaaffik, Namminersorlutik Oqartussat, kommuni, kommunit ataatsimoorfiat, kommunalbestyrelsit nunaqarfinnilu aqutsisut il.il. pillugit Inatsisartut inatsisaanni § 64-mut ilaasut, imaluunniit nunaqarfinni aqutsisut, pisortani oqartussat pineqartut taamatut akiliinissamut akisussaatinneqarsinnaapput.”

18. § 29-mi imm. 2-tut ikkunneqarpoq:

“Imm. 2. Imm. 1 malillugu pillarneqarnissamut akisussaatinneqartoq inuit, umiarsuaatiliunngitsumut allamik umiarsuarmi sullissamik isumaginnittussanngorlugit atorfinitsinneqarsimasut aamma umiarsuaatilimmut attuumassuteqartutut isigineqarput. Umiarsuup isumannaatsumik ingerlanneqarneranut peqqussut naapertorlugu naapertuuttuuneranik allagartamik suliniaqatigiiffimmut allanut, suliffeqarfinnut imaluunniit inummut umiarsuaatiliunngitsumut atuutilersitsisoqarsimappat, umiarsuup naalagaa imarsiortullu allagaammut atuutilersitsiffiusumut atasutut aamma isigineqassapput.”

§ 2

Umiarsuarni inuttat pillugit inatsimmi aalisariutit sunngiffimmilu angallatit usitussusiinut killiliussat allanngortinneqarneri pillugit nalunaarut nr. 463, 14. juni 2002-meersumi § 1, imm. 1, umiarsuarni inuttat pillugit inatsimmi § 14 naapertorlugu atuutilersinneqartoq, Kalaallit Nunaannut aamma atuuppoq.

§ 3

Peqqussut xx. Xxxx xxxx atuutilersinneqarpoq.

Chirstiansborg Slot-imi

Kunngiussutsitsinnik Atsiorpugut Naqissusiillutalu

MARGRETHE R.

/ Brian Mikkelsen